

saul van messel
aigh etmoal
gedichten

heemstede 1977

saul van messel
aign etmoal
gedichten

roum van kinder/
binn heur òln
spreukn van soalemo 17 : 6

heemstede 1977

ars poëtica

moijn muze
hou gait' mit joe?
oareg nuver
tou mor doe

veuròlders

daip in t loug
— oet bèste gronn —
bistoe geboorn
mien grönneger laid

schievm van ploug
deur vrisse wonn
sniedn mien woorn:
ik vergeet joe nait

tusn vlachtwedde en boertange ligt „op de stobm”
'n verloatn jeudnkerkhof

aign etmoal

doek die nacht
veur mien dreum
dij oet veurtied lacht

doek die dag
veur aignste dreum
dij mie nog liedn mag

vox

roege toal
veurdad ik heur
in mien meuln moal

bloum van meel
as ik heur
in mien laider veel

woensdegoavmd/31-10-1923

stombe duustern
zichtboar aan t licht
doar was dood
mit schaarpe zicht

kaddisj

nikkeln hallozie van pabbe
wuir noa zien dood
van zuver gòld

gòldsmid tied
is 'n wondere keerl

grinzn

mien geheur
hèt gebrek aan geluud

doarveur
waazt gain kruud

wèl duurt dien dode lipm
in inktpot stipm

petret van opoe

heur goud gezicht
praimm in mien gedicht

stoer waark veur woorn/
ik dou mien plicht

mor wèl dij
aan mien wieze wint

zègt ainmoal mor:
ik heb heur kind

confessio judaica

òfslodderd geleuf
wat dustoe
mit mien vleedn/

— och heedn —

boesjeude/woarschacuw

van jeudn en van spoukn
leezn ie allinneg nog in boukn

mor as t onkruud nait vergaait
zo laank as de weerd bestaat . . .

oppaazn is bòsschop minskn
ook veur dij boukn

net as vrouger veur jeudn
en loater veur spoukn

j. c. bloem/noagedachttnnis

t joar
op zien swaardst
komt de aaide
lichtn

mit n laandvol
haerst
in n haandvol
gedichtn

röttem/schipbreuk

woar blifstoe wind
mien zail hangt slok
't ol aailand wacht
op vrije vogels

op mien dek
ligt swoare drok
van doezend widde
kip kap kogels

vuurkeerls oet
oldachteg verhoal
zingn as liesters
in roege toal

psaalms van god
dij zok nou bokt
en schippers in
de daipte lokt

laive schipper
t wotter hoog
glimt as 'n
gòln reegnboog

seeln mit schoem/
gòlm zulverkleurd/
luudn metini —
hèst klokke nait heurd?

as ik smörns
wied van t wad
aanspuil in
vervremde stad

dreum ik nog
van kip kap kogels
in de locht
van vrije vogels

raaiderlaand/laidlerlaand

aan haarstdroadn
fien as spinwöbbe
hong van naacht
sikkom t haile noorn

mor wel zo vaast
dat aal woorn
van mörn bléévm daauwn/
as aan koabeltaauwn

schaaidn tusn baaidn

tusn waarkelkhaid en woorn
löpt strepe hail liek —
waarkelkhaid is t wad/
woorn binn diek

historia hesterna

ik bin al vroug in de weer
guster achter heer
veur vandoage gain tied
mörn is mie veuls te wied

èlk leuft ziennt

woorn overgòln
mien blikn paanje/
doaraan is gain hòln —
gain förm zunder fraanje

vrije wil

driftig woord
poest eevm oet

t laid mout nog gruïn
achter mien roet

ik stoa der boetn
mit mien schrievm

astoe wilt
magst aaltied bliev m

in memoriam

hooglaaid 2 : 7

geheugn dreugt
as goud op heege

k wait nog woar heugt
en wèl heur goud

verbeelns stoan
mien winst in weege

woar blifstoe wicht
van vlaais en bloud

roadsel

wèl zingt hier?
òf
wat zingt hier?

omwînsels

toal dij zok verweert
— befommeld in taze —
dij mien verleedn keert
as 'n versleedn jaze

naarns nait

winst
dij mie verròpt/
waarkelkhaid
dij mie verstòpt

tot hier aan tou

daank jou
stoere toal/
kainholt
oet mien veen/
smui as ween

sub specie aeternitatis/vergankelk

dat hai zok zo gebeert
is dat aal piene weerd

wat blift van hom
dat al vandoage nait verteerde

dit kold pampier
woarop zien guster reerde

inhold

ars poëtica	2
veuròlders	3
aign etmoal	4
vox	5
woensdegoavmd/kaddisj	6
grinzn	7
petret van opoe	8
confessio judaica	9
boesjeude	10
j. c. bloem	11
röttem	12/13
raaiderlaand/laiderslaand	14
schaaidn tusn baaidn	15
historia hesterna	16
èlk leuft ziennt	17
vrije wil	18
in memoriam/roadsel	19
omwînsels	20
naarns nait/tot hier aan tou	21
sub specie aeternitatis	22

kolofon

tou diswied tou wörn van saul van messel oetgeevm:

vrouger of loater 1969

twijspaalk mien bloasbaalk 1970

baaident bie van der veen in winschoot

en deur homzuls:

mien laid dat vlogt 1970

hèlp mie 't onthòln 1977

baaident oetverkòft

gehaaimschrift

wa'k nait meer wos

vruig: woar bist bleevm?

zee mie wa'k mos --

dát heb ik schreevm

heemstede *aign aarf*^e

herman heijermanslaan 25

